

# Carta xi majo catsingatju San Pablo xi cafahatsja xuta nandya Corinto

**1** Ngahan Pablo ne, casuaxa ná Jesucristu xi má ngahan apóstol tséhë me, tséhë xi cuatjin xi meje rë Nina. Hane ngahan cojo cha Timoteo xingueen ne, ningatjin ngu xujun vi tsujun, ngayujun ni xuta Corinto xi xuta ladu rë Nina ngayun. Hacuaha ningatjin xujun vi xi scutaya yëjë sa xuta ladu rë Nina jingujyë ni estadu Acaya vë. <sup>2</sup>Nina Nahmi naja cojo Nai naja Jesucristu ne, catisua nuju me cjuandaja cjuajeya.

## Vaxëndaja Pablo Nina ngajñi rë cjuañihi

<sup>3</sup>Nina Nahmi rë Nai naja Jesucristu ne, jemu tjin rë me cjuandaja. Me vëhë ne, hatuxa tjin rë me cjuayumatacun cojo niji hacuaha hatuxa sua niji me cjuetacun. <sup>4</sup>Sua niji me cjuetacun ngajñi rë yëjë ni cjuañihi xi vatjin má, cojo sa xi ngayin ne, hacuaha cuatjin cuma tihín rë xuta xi yahnga cjuetacun vëhë ngajñi rë yëjë cjuañihi xi vatju me má. <sup>5</sup>Chuva rë xi vatjin cjuañihi sacuatjin xi cavatju Jesucristu camá ne, hacuaha cuatjin sua niji me cjuetacun. <sup>6</sup>Hya xi cuatjin vatjin

cjuañihi ne, hatuxa cuatjin má cojo sa xi ngayun ne, sacú nuju cjuetacun hacuaha cuetjuntjun tséhë jyé nuju. Hacuaha hya xi cuatjin sacú niji cjuetacun ne, cuatjin má cojo sa xi hacuaha cojo ngayun ne, sacú nuju cjuetacun. Hane sacú nuju cjuetacun vëhë ngatsë rë xi hacuaha caa nuju cojo cjuañihi sacuaha cjuañihi xi vatjin má. <sup>7</sup>Ngayin ne, jemu vetihin tacuin nuju ta, tséhë xi hyin ta sacuatjin xi tivatjun cjuañihi ne, hacuaha tisacu nuju cjuetacun.

<sup>8</sup>Ngayujun ni ne, meje niji xi cumachaya nuju cjuacjintacun xi cavatjin camá ngajan estadu Asia. Jemu jyë camahani cjuañihi xi cavatjin camá, hisca ngahñu sa tsajin niji xi scaa niji cojo cjuañihi vëhë; quihndë tsajin niji cjuetacun xi cojo cjuahñu cuijnitihin. <sup>9</sup>Peru ngayin ne, hisca hatsëë camangu tacuin cojo cjuaveya niji. Cuatjin camá cojo sa xi hacuain cuetihin tacuin cjuatacun niji suvin ta cuetihin tacuin Nina, me xi tsicuya cjuahñu rë nima. <sup>10</sup>Nina ne, cavaxëtje niji me tséhë cjuacjintacun jyë xi meje tsiquehen niji jan, hacuaha cuaxëtje

sa niji me. Cavetihin tacuin Nina xi cuatjin cuaxëtje sa niji me, <sup>11</sup> tsêhë xi ngayun ne, hacuaha tiviseucun niji xi tichjahyun rë Nina ngatsë niji. Hane xi cjin xuta sahmi me cuatjin ne, hacuaha jemu cjin cuma ngayun xi tuhun nacuechji rë Nina tsêhë cjuandaja xi sua niji me.

**Chja Pablo mé má cjëë  
cjue me Corinto**

<sup>12</sup>Ngayin ne, nihni yehe yojo niji ngatsë rë xi ha hyin cojo cjuatacun niji ta tyjahi xahasen niji hacuaha nechin nguñaja tacuin xi tivanguin cojo ngasunhdë niji. Peru hacuiin cojo cjuatacun niji suvin xi cuatjin cun ngayin ta cojo cjuandaja rë Nina. Hacuaha hatuxa cuatjin cun ngayin hya xi nechin ngajni nuju. <sup>13-14</sup>Sacuaha cjua xi nihindin nuju ne, súv cjua xi ma chutayun hacuaha vijnercun. Ha vijnercun hitsë, peru meje niji xi ndaja sa cuijnercun cjuetacun vihi: Cuma nihnu yehe yojo nuju ngatsë niji sacuatjin xi cuma nihni yehe yojo niji ngatsë nuju, hya xi cuya nga Nai naja Jesucristu.

<sup>15</sup>Xi cuatjin catsingátaha cáacun ne, cavejñá xi cjué scusehenya nuju titjun, cojo sa xi jo ndiya sacú nuju cjuandaja. <sup>16</sup>Meje cuátju nangui nuju hya xi canduvá nguehe estadu Macedonia. Hane xi cuijnetaha cjuacjintacun naha nguehe Macedonia ne, hacuaha meje cúya scusehenya nga nuju ngu ndiya. Sehe ngajan xi ngayun ne, cuma cuiseacun ná cojo sa xi cuma cjué ngajan distritu Judea. <sup>17</sup>Xi cuatjin cavejñá cjuatacun naha sehe casahmee ne, chá tsajin rë cjuaquixi

cjua naha, má nuju? ¿Há má nuju ngayun ne, hya xi vejñá xi sahme ngu xcusun xi sahme ne, tangun han cojo ngu xuta ngasunhdë xi xcun cojo xcun ne, chja me ta cuma, hane xi taha ngaxtun ne, chja me ta cumaji? ¡Jéya, hacuiin cuatjin! <sup>18</sup>Nina, me xi hatuxa cjuaquixi ne, vëë me ta hacuiin jo ma tacuin xi nújin cojo nuju. <sup>19</sup>Sacuaha Jesucristu, Quihndi rë Nina, me xi catihin camachaya nuju cjua rë, cojo cha Silvanu cojo cha Timoteo ne, hacuiin jo tjin cacun me ta, yëjë ni cjua xi cachja me ne, hatuxa cjuaquixi. <sup>20</sup>Hane Jesucristu vë ne, me vëhë xi sahmi chihin me yëjë ni cjua xi ha cachja Nina xi cuma. Vëhë xi hora xi chjahanrcun Nina xi nújanyuman cojo Jesucristu ne, nújan “Amén” (O sa tsajin ne, nújan “Cuatjin jain.”) <sup>21</sup>Nina ne, hacui me xi sahmi xi viyujucahndé cjuatacun naja xi macjain naja Jesucristu. Hacui ni me xi cavaxijin me ngayaan. <sup>22</sup>Sacuaha xi cavisane me sellu rë me ngayaan; caveya me Hasen rë me cahntsua xahasen naja cojo sa xi ngutjen tsejen ta quixi jain xi, hya xi cuma ngascan ne, sua jain naja me yëjë ni xi ha cachja me.

<sup>23</sup>Quihndë ne, quejen cavusehenya nuju sacuatjin xi ha cachjá cojo nuju ngatsë rë xi mijí tsisava nuju xi cuichjátaha nuju. Sa xi quixiin xi chjá ne, catitsingatju Nina cjuaveya xi cuma ná. <sup>24</sup>Hacuiin xi meje cuitexin nuju jarë ngu cjua xi hatuxa meje rë xi cumacjain nuju ta, tsêhë xi ngayun ne, ha siucahndé cjuatacun nuju cojo cjuachacun xi macjain naja. Ta

ngayin ne, tivisecuin nuju cojo sa xi cuma sua sa rë xahasen nuju.

**2** Hya xi camá ne, cavejñá cjuatacun naha xi hacuiin ngutjen cjuë scusehenya nuju sá tu choho cuma rë xahasen nuju ngatsë rë cjua xi cuichjá cojo nuju. <sup>2</sup>Cuatjin cavejñá cjuatacun naha ta, ngayun tiniññu xi ma sua rë xahasen naha. Vëhë xi sa xi sahme xi cuma va rë xahasen nuju ne, ndajin tjin ta, xi cuatjin sahme ne, sahme xi cuma va rë xahasen rë xuta xi tisahmi xi ma sua rë xahasen naha. <sup>3</sup>Vëhë xi cuatjin catsihindu nuju nixtin hya, cojo sa xi hya xi cuinduva ndyá ne, hacuiin cuma va rë xahasen naha ngatsë nuju ta, xi meje rë ne, tuhun rë xahasen naha cjuasua. Hacuaha mangu cáacun cojo nuju ngayujun ni. Mangu cáacun xi tu mé ni xi sahmi xi jemu sua ma rë xahasen naha ne, hacuaha vëhë ni ne, sahmi xi jemu sua ma rë xahasen nuju. <sup>4</sup>Hya xi catsihindu nuju cjua vëhë ne, jemu choho ma ná, jercu cjín catsingátaha cáacun ngatsë nuju, hisca jercu cajñhnda; mijí ná xi cuma va tacún ta xi meje ná ne, xi cumachaya nuju ta cjuahmutacun xi tjin ná cojo nuju ne, jemu jyë camahani.

**Ma manchataha me xi cavinchachoho**

<sup>5</sup>Quihndë ne, sacuaha ngu xuta xi cavinchachoho vë ne, hacuiin ngahan ni choho camá ná ta, ngayujun ni ne, hacuaha choho camá nuju hitsë. “Hitsë ni” chjá ta, mijí cuátjutaha xi tichjátaha nuju. <sup>6</sup>Quihndë xi cjín ngayun

canújuntuhun rë xuta jan ne, cojo vëhë ni ne, ha cuma. <sup>7</sup>Cahndé rë xi cuinújuntuhun sa rë me ne, ninchatuhun rë me, tuhun rë me cjuetacun, sá tu scaain rë me cojo cjuachoho jyë vëhë.

<sup>8</sup>Vëhë xi chjá cojo nuju ta tuhun nga catamachaya rë me tsëhë cjuahmutacun xi tjin nuju cojo me.

<sup>9</sup>Vëhë jain xi cuatjin catsihindu nuju ta, tsëhë xi meje cjuaháchuva nuju ne, há tjin ngu tacún xi nihñu jyë ni hacutjin chjá cojo nuju.

<sup>10</sup>Quihndë ne, yo xi ninchatuhun rë tsëhë ngu jyë xi sahmi ne, ngahan ne, hacuaha tsinchátaha rë ta, tu mé ni xi catsinchátaha ne, vë Jesucristu ta ngatsë nuju ngayun ne, vëhë xi cuatjin catsinchátaha, <sup>11</sup>cojo sa xi cumaji sahmi Satanás xi meje sahmi cojo naja. Ngayaan ne, ha ndaja hyan hacutjin meje sahmi xitsehen vë cojo naja.

**Cjuacjintacun rë Pablo ngajan nandya Troas**

<sup>12</sup>Hya xi camá ne, cëjë ngajan Troas xi cuichjá cojo xuta cjuandajyihí xi chja tsëhë Nai naja Jesucristu. Hane xi cafëhë ngajan ne, vutsején ne, jemu casacu ná cahndé xi cuichjá cojo xuta cjuandajyihí jan. <sup>13</sup>Peru hacuiin ndaja má cáacun xi casacuiin ná cha Titu xingueen sacuatjin xi catsingátaha cáacun. Vëhë xi catsinguíjnetaha cjua cojo xuta jan sehe cavëtju canduvá nguehe estadu Macedonia.

**Tsinguitsojo Pablo cjua rë Nina**

<sup>14</sup>Peru nacuechji rë Nina ta hatuxa sahmi me xi caa nijí

vetjintjin ngatsë rë xi tjin tangun cjuatacun niji cojo Jesucristu. Chuva vëhë xi Nina ne, sahmi me xi cumachaya rë xuta cjuatacun rë me jingujyë ni. <sup>15</sup>Ta ngayin ne, sacuaha xta rë tyjungunsa ngayin xi tisua Jesucristu xi cuma rë Nina. Xta ndajyihi vëhë ne, vitsojo vechutaha rë yëjë ni xuta, sa xuta xi tivetjtutje me tsëhë jyë rë me o sa xuta xi tivetjintjiin me. <sup>16</sup>Xi vutsejen niji xuta xi cuacun tivetjintjiin jan ne, sacu rë me cjuaquixi ta quixi jain xi cuechiin me xcun Nina. Peru xi vutsejen niji xuta xi cuacun tivetjtutje jan ne, sacu rë me cjuaquixi xi quixi jain xi cuechu me xcun Nina. Ngayin ne, cumaji nihñi cojo cjuatacun niji suvin xa vë xi sacu rë xuta cjuaquixi jan. <sup>17</sup>Ngayin ne, hacuiin tivateñi cjua rë Nina sacuatjin jemu cjin xuta tisahmi me ta ngayin ne, nechin nguñaja tacuin xi nújin cojo xuta cjua vëhë. Nina casua niji me xa hacuaha vutsejen me xa xi nihñi. Hacuaha tinihñi xa vëhë ta tsëhë xi tjin tangun cjuatacun niji cojo Jesucristu.

### Compromisu xatsë xi casahmi Nina

**3** ¿Há má nuju xi tinaxinndijin suvin nga yojo niji xi cuatjin nújin? O há tsajin ne, ¿há mameje rë xi tihín nuju o sa xi chjahyin nuju ngu carta xi chja ngatsë niji, sacuatjin sahmi yahnga xuta? <sup>2</sup>¡Jéya! mamijí rë ta, ngayun xi má ngayun sacuaha carta niji, sacuaha ngu carta xi camahindu cahntsua xahasen niji, ngu carta xi cuma scutsejen yëjë ni xuta ne, hacuaha cuma scutaya me. <sup>3</sup>Hane suvá tsejen xi Jesucristu catsihindu

me carta jan, hane ngayin ne, tu canihñi entregadu ni. Hacuiin cojo tinta camahindu ta cojo Hasen rë Nina xi quicun me. Hacuaha hacuiin xcun ndyojo të camahindu ta cahntsua xahasen rë xuta.

<sup>4</sup>Cuatjin nújin cojo nuju ta, tsëhë xi mangu tacuin cojo Nina ngatsë rë Jesucristu. <sup>5</sup>Hacuiin cjuatacun niji suvin, hacuiin ngahñu niji suvin xi ma nihñi mé xi nihñi ta Nina casua niji me cjuatacun, Nina casua niji me ngahñu. <sup>6</sup>Me vëhë casahmi me xi machjirëhë rë me ngayin xi tihín cumachaya rë xuta compromisu xatsë xi sehe tivetsihin tisahmi Nina cojo xuta, hane compromisu xatsë vëhë ne, hacuiin ngu ley xi cuinuhyan tsëhë ta ngu ndiya ndajyihi xi tsingacun naja Hasen rë Nina xi cuanguenocjon. Cuatjin casahmi Nina ta tsëhë xi xuta xi cumaji sahmichihin me yëjë ni cjua xi vitexa ley ne, sacú rë me ngu castigu xi cuetsun cjuatacun rë me hacuaha tsajin nu tsajin nixtin xi cuechu me xcun Nina. Peru xuta xi tjengui me Hasen rë Nina ne, sacú rë me ngu cjuahñu ndajyihi, hacuaha cuechu me xcun Nina.

<sup>7</sup>Ngayujun ni ne, ha hyun ta sacuaha ley rë Nina xi catsihindu Moisés ne, catiya xcun ndyojo të haya xi camahindu, hacuaha xuta xi maji sahmi me yëjë hacutjin vitexa ley jan ne, cumaji cuechu me xcun Nina. Hane sacuaha xa xi casahmi Moisés haya xi casua me camachaya rë xuta cjua rë ley jan ne, hacuaha ha hyun xi jercu vengui chji rë ta, tsëhë xi camatsejen ngu hasen ndajyihi xi hisca camaji cavutsejenndaja xuta Israel xcun

Moisés ta jercu tu seti camahani jyihi xcun me. Peru hasen ndajyihi vèhë ne, tafi tafi ne, cafëya suvá. <sup>8</sup>Hacuaha ha hyun ta ngayin ne, titihín tijmachaya rë xuta cjuatshëhë hacutjin sua naja Nina Hasen rë me. Quihndë ne, sa xi cuatjin jemu cavengui chjí rë xa xi casahmi Moisés jan ne, hitsë sa jercu vengui chjí rë xa xi tinihñi ngayin. <sup>9</sup>Cuma cuinújan ne, sa xi jemu cavengui chjí rë xa xi casahmi Moisés, hya xi casua me ley xi chja xi sacú naja ngu castigu sa xi hacuiin nihña chehen cjuatshëhë rë ne, hitsë sa jemu vengui chjí rë xa xi tinihñi ngayin, quihndë xi tinújin cojo xuta xi cuma sacú naja ngu xahasen tyjahi, ngu cjuatacun tyjahi. <sup>10</sup>Cuma cuinújan ne, sacua ha rë Nina xi casahmi Moisés xi jemu ndajyihi titjun ne, quihndë ne, sacua ha xi ha quihndë tsajin mé ndajyihi tsëhë ta, xa rë Nina xi tinihñi ne, jercu tu ndajyihi camahani. <sup>11</sup>Sa xi jercu ndajyihi ngu xcusun xi hacuiin cuejña tsëë ne, hitsë sa ndajyihi ngu xi cuejña tsëë.

<sup>12</sup>Ngatsë rë xi cuatjin vetihin tacuin Nina ne, vèhë xi ngayin ne, rcuiin camahani xi nújin cojo xuta. <sup>13</sup>Hacuiin nihñi sacuatjin casahmi Moisés, hya xi cavetsa me xcun me cojo ngu tsjian cojo sa xi xuta tjë rë Israel ne, scuiin me hacutjin tifëya suvá hasen ndajyihi xi jyihi xcun Moisés jan. <sup>14</sup>Peru xuta jan ne, camajñu tsëhë cjuatacun rë me. Hisca quihndë nixtin vihi ne, hya xi visiñuju me cjuatshëhë rë ley changa vèhë ne, maji vijnercu me cjuatshëhë rë, sacua ha xi titsa rë cjuatacun rë me cojo tsjian jan. Hisca hya xi

cumacjain rë me Jesucristu ne, hya sacua ha xi cuetjuxin tsjian jan, hya cuma cuijnercu me. <sup>15</sup>Peru hisca quihndë ne, hya xi visiñuju me cjuatshëhë rë catsihindu Moisés ne, sacua ha xi tsjian jan vechja rë cjuatacun rë me, hane maji vijnercu me. <sup>16</sup>Peru hya xi ngu xuta cuisehen me ndiya rë Nai naja ne, sacua ha tsjian jan ne, cjuexin tsëhë me, hane cuma cuijnercu me. <sup>17</sup>Nai naja ne, hacui me xi Hasen rë Nina, hane hiscan xi tacun Hasen rë Nai naja ne, tsajin mé xi vechja rë cjuatacun naja. <sup>18</sup>Vèhë xi ngayejen ngarcan ni ne, tsajin titsa rë cjuatacun naja cojo tsjian vèhë, hacua ha xi vutsejen xuta ngayaan ne, ma vutsejen me cjuandaja rë Nai naja sacua ha tsejen mé xi tsejen xcun ngu speju. Hane ngayaan ne, jima tiña jima tiña sa cjuatacun naja cojo cjuatacun rë Nai naja ta, tsëhë xi jima ngu ndiya ne, tisacu sa naja cjuandaja rë me. Nai naja ne, suvá hasen me, hane hacui me xi cuatjin tisahmi.

**4** Nina casahmi me cjuandaja cojo niji, hane casua me xa vèhë xi nihñi. Vèhë xi hatuxa hacuiin machuva tacuin. <sup>2</sup>Ngayin ne, cavejñi tacuin xi nihñi yëjë ni xi ticojo rë cjuasava xi tahahma má; hacuiin vindachin, hacuiin nindeyin cjuatshëhë rë Nina ta, suvá cjuaquixi yëjë ni xi nújin cojo xuta. Cuatjin nihñi cojo sa xi scuëë yëjë ni xuta ta cuatjin jain xi nújin. Hacua ha vëë Nina xi cuatjin nújin. <sup>3</sup>Hane sa xi vijniircu xuta cjuandajyihi xi chja tsëhë Jesucristu xi titihín cumachaya rë me ne, peru suvá xuta xi tivetjintjin me

ne, me vëhë xi cuatjin vijniircu me. <sup>4</sup>Xitsehen xi matitjun xi tacun nixtin vihi ne, cavetsa cjuatacun rë xuta xi cuacun macjaain rë Nina xi cjuaquixi, cojo sa xi cuiisiin rë me cjuahasen rë cjuandajyihi xi chja hacutjin xi jyë hnga Jesucristu cojo cjuatacun rë me. Hya xi machaya naja tsëhë Jesucristu ne, hacuaha hyan hacutjin jemu ndaja camahani Nina. <sup>5</sup>Ngayin ne, hacuiin nújín cojo xuta xi nai nuju ngayin ta xi nújín ne, Jesucristu xi Nai naja me; hane ngayin ne, tivisequin nuju sacuaha ngu mosu hndixahan nuju ta, tsëhë xi cuatjin cavitexa niji Jesucristu. <sup>6</sup>Hane ntsacu cavetsihin ne, cachja Nina ta ngajñi rë jñu ne, cuma hasen. Hane hacui ni me xi caveya me cjuahasen ngajñi rë cjuatacun niji, cojo sa xi ngayin ne, tihín cumachaya rë xuta, cuijnercu me hacutjin jemu ndaja camahani Nina. Hane hya xi machaya naja tsëhë Jesucristu ne, hacuaha hyan hacutjin jemu ndaja camahani Nina.

#### **Cjuahñu xatsë xi sua Nina**

<sup>7</sup>Cjuahasen xi casua niji Nina jan ne, quichihin ngajñi rë cjuatacun niji, sacuatjin xi jiya cjuanchina cahntsua ngu tiji xi nihndë ni camá. Cuatjin casahmi Nina cojo sa xi matsejen xi jemu hñu camahani ngahñu xi sua niji Nina. Hacuiin cojo ngahñu niji suvin xi caa niji nihñi yëjë ni xi tinihñi ta Nina ne, me vëhë xi casua niji me ngahñu; hacuaha jemu ndaja camahani ngahñu xi sua niji me. <sup>8</sup>Ha tu yani ni xi vanguin ne, jemu yehe cjuacjintacun vatjin má, peru sacuya niji chuva rë hacutjin xi

naxintjin yojo niji; hisca hyiin mé xi ndatjin nihñi. Peru nihñichuviin cjuatacun niji; <sup>9</sup>jemu suaxti niji xuta hacuaha choho sahmi me cojo niji, peru Nina ne, tsismicacuaain niji me; vaja niji xuta, hisca viticjin, peru hacuiin tsiquehen niji me. <sup>10</sup>Xi nujyihinyin cojo cjuar rë Nina ne, hatuxa meje tsiquehen niji xuta, sacuatjin catsiquehen me Jesucristu. Cuatjin tijima ne, cojo sa xi xuta ne, xi scutsejen me hacutjin ticaa niji ne, cumachaya rë me ta quixi jain xi tisacu niji cjuahñu sacuaha cjuahñu rë Jesucristu. <sup>11</sup>Ngayin xi quicun ngayin ne, tjin xuta xi jemu meje tsiquehen niji me ngatsë rë xi quichihin cjuandajyihi xi chja tsëhë Jesús. Cuatjin tijima ne, cojo sa xi cuma tsejen xi yojo jyé niji vi xi hatuxa cueya ne, hacuaha tisacu rë cjuahñu sacuaha cjuahñu rë Jesús. <sup>12</sup>Ngajan xi ngayin ne, tisacu niji cjuaveya; peru ngayun ne, tisacu nuju cjuahñu xatsë.

<sup>13</sup>Tjin hiscan xi chja xcun xujun rë Nina cuitjin: “Camacjain ná, vëhë xi cachjá”; hane ngayin ne, tangun macjain niji cojo me xi cuatjin catsihindu cjuar jan. Vëhë xi hacuanitjin ni nújín ngayin: “Macjain niji, vëhë xi nújín.” <sup>14</sup>Hacuaha hyin ta Nina, me xi catsicuya cjuahñu rë Nai naja Jesús hya xi cahme me ne, hacuaha cuechu nixtin xi cuatjin tsicuya me cjuahñu niji, hane sahmi tangun me ngayin ngajan hiscan tacun Jesús. Hacuaha cuatjin sahmi me cojo nuju. <sup>15</sup>Yëjë ni xcusun xi tivatjin tijima ne, ngayun ndaja tsujun ta, xi cuma cjin sa ngayun xi sacu nuju cjuandaja rë Nina ne, ha cuatjin cjin

sa cuma ngayun xi tuhun nacuechji rë me. Hane cuatjin cuma tsejen xi Nina ne, jemu ndaja camahani me.

<sup>16</sup>Vëhë xi hatuxa nihñichuviin cjuatacun niji. Handasa tivetsun hitsë tivetsun hitsë yojo niji xi jima changa ngayin ne, peru cjuatacun niji ne, jima xatsë ngu nixtin ngu nixtin. <sup>17</sup>Hane cjuacjintacun xi tivatjin tijima nguehe ngasunhdë ne, sacuaha xi hacuiin yehe camahani ta, tsëhë xi hya xi ha cacaa niji ne, hya sacú niji cjuandaja, sacú rë xahasen niji ngu cjuasua xi jemu ndajyihi camahani, hacuaha tsajin nixtin xi cjuë.

<sup>18</sup>Ngayin ne, hacuiin tivetihin rcuin yëjë ni xi tsejen ta xi vetihin rcuin ne, xi cjëë cuma tsejen. Cuatjin nihñi ta, tsëhë xi yëjë ni xi tsejen ne, cuechu nixtin xi cjuë, peru xi cjëë cuma tsejen ne, tsajin nu tsajin nixtin cjuë.

**5** Hacuaha nihñichuviin cjuatacun niji ta, tsëhë xi ha hyin ta sa xi cueya yojo niji sacuatjin vetsun ngu ndihya yuma ne, sacú niji ngu xcusun yojo xatsë ngajan ngahnga xi tsajin nu tsajin nixtin cueya, sacuaha ngu ndihya ndajyihi xi suvá Nina casahmi me xi cuma niji. <sup>2</sup>Vëhë xi ngayin ne, hisca fë tacuin ta, tsëhë xi jercu meje chjihinntsins sacuaha yojo xatsë niji xi sua Nina jan, <sup>3</sup>cojo sa xi chijin yojo xatsë vëhë sacuatjin chajá rë ngu tsjian. Xi cuatjin ne, cuechiin ngu nixtin xi siu suvá hasen niji xi tsajin yojo niji. <sup>4</sup>Ngayin xi nechin cojo yojo jyé niji vi ne, hisca fë tacuin ngatsë rë xi jercu meje niji yojo xatsë xi sehe sacú niji. Hacuini meje niji

xi cueyin ta xi meje niji ne, yojo xatsë niji. Cuatjin meje niji cojo sa xi yojo jyé xi hatuxa cueya ne, cjuëya; hane suvá cjuahñu xatsë vëhë cuejña. <sup>5</sup>Quihndë ne, me xi cuatjin cavejña cjuatacun rë xi cuitjin cun cuma ngayin ne, hacui Nina. Hacuaha me vëhë xi caveya me Hasen rë me cahntsua xahasen niji, cojo sa xi ngutjen tsejen ta quixi jain xi, hya xi cuma ngascan ne, sua jain niji me yojo xatsë vëhë.

<sup>6</sup>Vëhë xi hatuxa tihín ngahñu xahasen niji. Hyin ta jinguyëjë rë xi nechinchahndin cojo yojo jyé niji vi ne, sacuaha xi nechintihin ngu nangui ta, tsëhë xi cjëë cuechin hiscan xi cuinechinchahndin cojo Nai naja. <sup>7</sup>Ngayin ne, mangu tacuin cojo Nai naja xi tivanguin cojo ngasunhdë niji, handasa matsijin me. <sup>8</sup>Cuyin cuinújin cojo nuju ta ngayin ne, titihín ngahñu xahasen niji. Hacuaha xi má niji ne, hitsë sa ndatjin xi cuetjinxin tsëhë yojo jyé niji, hane cjuanguin cuinechinchahndin cojo Nai naja. <sup>9</sup>Vëhë xi sa xi cuinechintihin sa nguehe ngasunhdë, o sa xi cuinechinchahndin cojo Nai naja ne, jemu meje nihñi yëjë ni hacutjin chuya rë me ta, <sup>10</sup>tsëhë xi ngayejen ni ne, cuechu nixtin xi cuma tsejen xi cun xi má ngayaan hya xi cuechuun xcun Jesucristu, xi cjuahacuenda me xcusun xi canihña, cojo sa xi jima ngu ngayaan ne, sacú naja xi satë naja ha tucutjin xcusun xi canihña xi cavinechan ngasunhdë, há ndaja ne, há ndajin.

**Cjuandajyihi xi sahmi tangun cjuatacun naja cojo Nina**

<sup>11</sup>Ngayin ne, ha hyin mé vijne xi rcuin Nina. Vëhë xi meje nihñi



xi cuijne cacun xuta. Nina ne, ha vëë me xi cun xi má ngayin. Hacuaha cojo ngayun ne, vetihin tacuin xi cumachaya nuju xi cun xi má ngayin. <sup>12</sup>Hacuiin tivétsihin tinihñi yehe suvin nga yojo niji ta tu titihín cumachaya nuju hacutjin cuma naxunndujun niji, cojo sa xi cuma nicuyun cjua tséhë xuta xi chuya rë me tséhë xcusun xi jyihi ngu cha, hane sahmicuendaain me cjuatacun rë cha. <sup>13</sup>Chja yahnga xuta ta sca niji, hane yahnga me ne, jemu xta ngayin; peru há sca niji o há xta ngayin ne, peru nihñi yëjë ni ngatsë rë xi tséhë Nina ngayin, hacuaha ngatsë rë xi meje cuisecuin nuju. <sup>14</sup>Cuatjin nihñi ta tséhë xi cjuahmutacun xi tjin rë Jesucristu cojo niji ne, vëhë xi vitexa niji. Cuitjin ningatihin tacuin: ngu ni Jesucristu xi cahme me ngatsë rë jyé naja ngayejen ni, vëhë xi ngayejen ni ne, sacuaha xi ha caveyan xi cuma rë jyé xi cuacun vé. <sup>15</sup>Jesucristu ne, cahme me ngatsë naja ngayejen ni ne, cojo sa xi ngayaan xi casacu naja cjuahñu xatsë ne, hacuiin nihñacuendan suvá ni yojo naja ta hacuaha nihñacuendan tséhë me vëhë, me xi cahme hacuaha cavuya me cjuahñu ngatsë naja.

<sup>16</sup>Vëhë xi ha quihndë hacuiin nutsijin xuta sacuatjin vutsejen ngu xuta xicjin me cojo cjuatacun rë ngasunhdë. Hatsëë ne, cuatjin canutsijin Jesucristu, peru quihndë ne, hacuiin cuatjin nutsijin me. <sup>17</sup>Yëjë xuta xi tjin tangun cjuatacun rë me cojo cjuatacun rë Jesucristu ne, ngu xuta xatsë camá me. Xcusun changá xi tjin rë me

ne, cafë, ha cama xatsë. <sup>18</sup>Nina ne, me vëhë xi tisahmi me yëjë cjuatacun xatsë vëhë. Ngayin xi condra rë Nina camá ngayin hatsëë ne, casahmi me xi camatangun cjuatacun niji cojo cjuatacun rë me ngatsë rë cjuacjintacun xi cavatju Jesucristu. Hacuaha casua niji me xa xi tihín cumachaya rë xuta hacutjin tisahmi tangun me cjuatacun rë xuta cojo cjuatacun rë me. <sup>19</sup>Cojo cjuacjintacun xi cavatju Jesucristu camá ne, cavetsihin casahmi Nina xi cuma tangun cjuatacun rë xuta cojo rë me, cavetsihin cafaahuendaain me tséhë cjuatsehen xi casahmi xuta, hacuaha cavetsihin casua niji me cjuandajyihni xi tinújin cojo xuta xi Nina ne, meje rë me xi cuma tangun cjuatacun naja cojo rë me. <sup>20</sup>Vëhë xi ngayin ne, cuatjin nújin cojo xuta cjua rë Jesucristu ta, Jesucristu casua niji me xa xi cuatjin nújin, sacuaha xi tichja suvá Nina cojo xuta ngajñi rë cjua xi nújin. Vëhë xi sacuatjin xi vitexa niji Jesucristu ne, chjahyín rë xuta xi catisahmi tangun me cjuatacun rë me cojo Nina. <sup>21</sup>Jesucristu ne, tsajin mé jyé rë me xi tjin, peru ngatsë naja ngayaan ne, Nina casahmi me xi Jesucristu ne, sacuaha xi jercu tjin camahani jyé rë me. Cuatjin casahmi Nina cojo sa xi ngayaan xi tjin tangun cjuatacun naja cojo Jesucristu ne, hacuaha jemu tyjahi camahani cuma cjuatacun naja sacuatjin tyjahi cjuatacun rë Nina.

**6** Hane xi tinihñi tangun xa cojo Nina ne, hacuaha nújin cojo nuju ta, mijí rë xi tu mahya



xi casacu nuju cjuandaja rë Nina.

<sup>2</sup>Cachja Nina cuitjin xcun xujun rë me:

    Ngu hora ndajyihi ne, cahndë  
    cjuaxi canojo cojo ná;  
    ngu nixtin xi vetjutje xuta ne,  
    cavisécoo ri.

Quihndë ne, ha cavechu ngu hora ndajyihi vëhë, sacuatjin cachja Nina; ha cavechu ngu nixtin xi tivetjutje xuta.

<sup>3</sup>Ngayin ne, nihñii camahani xcusun xi sahmi xi secjan cjuatacun rë xuta, sá tu choho cuichja xuta tsëhë xa xi tinihñi. <sup>4</sup>Yëjë xcusun xi tivatjin tijima xcun xa xi tinihñi ne, tsingacun rë xuta ta ngayin ne, tivisecuin jain rë Nina cojo xa xi meje rë me xi nihñi. Jemu cjin cjuacjintacun xi cacaa niji: tjin hora ne, jemu cavatjin cjuañihi, tjin hora ne, cavatjin ngu cjuandya jyë, tjin hora ne, casacuinyiin niji hacutjin naxintjin yojo niji. <sup>5</sup>Tjin hora ne, cavaja niji xuta, tjin hora ne, cavincha niji me ndavaya, tjin hora ne, choho casahmi xutacjin cojo niji, tjin hora ne, jemu chja xa canihñi, tjin hora ne, camaji catsjuñifin, tjin hora ne, hisca casacuiin mé xi xiní. <sup>6</sup>Hacuaha tsejen xi tivisecuin jain rë Nina ngatsë rë xi tyjahi xahasen niji, vechu cjuatacun niji, jemu jyë tacuin, jemu nihñi cjuandaja, jiya Hasen rë Nina cahntsua xahasen niji, nguñaja tacuin xi hmu tacuin xinguin, <sup>7</sup>hacuaha súv cjuaquixi tjin rë cjuatacun niji, Nina ne, sua niji me ngahñu. Hatuxa cjuaquixi cjuaxi nújin, há xi titihín jimachaya rë xuta cjuaxi rë Nina, o há xi tinaxintjin yojo niji tsëhë xuta xi choho chja tsijin.

<sup>8</sup>Yahnga xuta ne, faharcun me ngayin, yahnga me ne, faharcuaain me ngayin. Yahnga xuta ne, ndaja chja me tsijin, yahnga me ne, choho chja me tsijin. Xi má rë ngujo xuta ne, jemu ndacha ngayin, handasa quixi ngayin cojo ngasunhndë niji xi tivanguin cuijin. <sup>9</sup>Yahnga xuta ne, hisca hvíin me yo ngayin, peru yahnga me ne, vëë me ngayin. Ngayin ne, sacuaaha xi ha tiveyin, peru cjëë cueyin ta nechincuihin cjuahñu. Sahmi xuta ngayin castigu, peru hacuiin tsiquehen niji me. <sup>10</sup>Sacuaha xi jemu choho má rë xahasen niji, peru xahasen niji ne, hatuxa jemu sua rë. Sacuaaha xi jemu yumi ngayin, peru jemu nihñi nchina xuta cojo cjuaxi rë Nina. Sacuaaha xi tsajin camahani mé xi tjin niji, peru ha tsijin yëjë ni xi tjin ngasunhndë.

<sup>11</sup>Ngayun xuta Corinto ne, ha canújin cojo nuju yëjë ni hacutjin ningatihin tacuin, hacuaaha jemu hmu tacuin nuju. <sup>12</sup>Ngayin ne, hacuiin camachuva cjuahmutacun xi tjin niji cojo nuju ta ngayun xi camachuva cjuahmutacun xi jiya cahntsua xahasen nuju. <sup>13</sup>Vëhë xi chjá cojo nuju sacuaaha xi quihndi naha ngayun, catamajyë sa cjuahmutacun xi tjin nuju sacuaaha cjuahmutacun xi tjin niji cojo nuju.

**Yungun rë Nina xi quicun  
me ngayaan**

<sup>14</sup>Peru mijí rë xi nihñu tangun cojo xuta xi macjaain rë me cjuaxi rë Jesucristu sacuatjin ma hñu jo chu ndyaja xi tangun cjue chu. Sacuaaha cjuandaja ne, matanguaain camahani cojo

cjuatsehen. Hacuaha cumaji cuma jñu hiscan xi jemu hasen. <sup>15</sup>Cumaji camahani cumatangun cjuatacun rë Jesucristu cojo cjuatacun rë Satanás. Hacuaha cumaji camahani cumatangun cjuatacun rë ngu xuta xi macjain rë me cjua rë Jesucristu cojo cjuatacun rë ngu xuta xi macjaain rë me cjua rë Jesucristu. <sup>16</sup>Sacuaha yungun rë Nina xi cjuaquixi ne, cumaji cuiyuju nina xi tsindaja xuta. Hane ngayaan ne, sacuaha yungun rë Nina xi quicun me ngayaan ta, tsëhë xi suvá Nina cachja me cuitjin:

Ngahan ne, cuitejñacahndë  
cahntsua xahasen rë me,  
hacuaha tsujyëhëya ngajñi rë  
me;  
hane ngahan cuma nina rë me  
ngahan,  
hacuaha me xi cuacun vëhë ne,  
cuma me xuta naha.

<sup>17</sup>Hacuaha cachja sa Nina cuitjin:  
Vëhë xi tetjunixun tsëhë xuta xi  
cuacun faharcun me nina xi  
mandaja, hacuaha nechunxun  
tsëhë me;  
mijí rë xi nicujun sa xcusun xi  
chjá cojo nuju xi tsavi.  
Xi cuatjin nihñu ne, cuitejña  
ngatsë nuju

<sup>18</sup>hacuaha ngahan ne, cuma  
ngahan nahmi nuju,  
hane ngayujun ni ne, hacuaha  
cuma ngayun quihndi naha,  
chja Nai naja, me xi ma sahmi  
yëjë ni xcusun.

**7** Quihndë ngayujun ni tsan ne,  
tsëhë xi cuatjin cachja Nina xi  
sahmi me cojo naja ne, meje rë xi  
cuiyujunxen yëjë ni cjuatsehen xi  
meje rë yojo naja o sa xi ningatahan

tacun. Hane xi rcun ngayaan Nina  
ne, meje rë xi nihña ngahñu xi  
cuma tyjahi xahasen naja, cuma  
tyjahi cjuatacun naja.

**Cavindeya cjuatacun rë xuta Corinto**

<sup>2</sup>Nuxuhun xahasen nuju xi cuma  
niji. Hisca ngu ngayun ne, hacuiin  
choho canihñi cojo nuju; hisca ngu  
ngayun ne, hacuiin caninguetsin  
cjuatacun nuju; hisca ngu ngayun  
ne, hacuiin cavindachin nuju.

<sup>3</sup>Hacuiin titscaneje jyé nuju xi  
cuatjin chjá cojo nuju. Ha cachjá  
cojo nuju ta hatuxa jemu vinga niji  
ngayun, hisca tihín yojo niji ngatsë  
nuju sa xi cuatjin meje rë. <sup>4</sup>Jemu  
camangu cáacun cojo nuju, hacuaha  
hya xi visiajme cojo xuta ne, jemu  
vaxëndaja nuju.

Jemu casacu ná cjuetacun. Jemu  
sua ma rë xahasen naha ngajñi rë  
yëjë cjuañihi xi cavatjin camá.

<sup>5</sup>Hisca nixtin xi cafihin nguehe  
estadu Macedonia hisca quihndë  
ne, cjëë cjuahajenda xahasen niji,  
ta yëjë ni nixtin vihi ne, jercu cjin  
cjuañihi tivatjin tijima. Ticjan xuta  
cojo niji, hacuaha jemu macjin  
tacuin. <sup>6</sup>Peru Nina xi sua cjuetacun  
xuta yuma ne, hacuaha cuatjin casua  
niji me cjuetacun hya xi cafehe  
cha Tito. <sup>7</sup>Hacuiin tsëhë xi cafehe  
ni cha xi casacu niji cjuetacun ta,  
hacuaha ngatsë rë cjua xi cachja cha  
hacutjin xi casacu rë cha cjuetacun  
ngajñi nuju. Cachja cha cojo niji ta  
jemu meje nuju xi sacú xingueen.  
Hacuaha casuacuenta niji cha tsëhë  
cjuachoho xi tjin nuju. Hacuaha  
cachja cha ta jemu meje nihñu  
xcusun xi chuya ná. Vëhë xi hitsë sa  
camasua rë xahasen naha quihndë.

<sup>8</sup>Hacuiin choho ma ná xi cuatjin catsihindu nuju xujun vèhè, handasa choho camá nuju ngatsè rè cjuá xi cachjá cojo nuju. Choho camá ná hitsè ta, tsèhè xi cahvè ta cjuá naha jan ne, casua nuju cjuachoho ndastu ngu hora. <sup>9</sup>Peru quihndè ne, jemu ndama ná, hacuiin ngatsè rè xi choho camá nuju ta ngatsè rè xi sacuaha cjuachoho xi camá nuju ne, vèhè casahmi xi canindeyun cjuatacun nuju. Hacuaha hya xi choho camá nuju ne, canihñu hacutjin chuya rè Nina, vèhè xi tsajin mé xi choho cavatjun camá ngatsè rè cjuá xi canihindin nuju. <sup>10</sup>Hya xi nihñachehen hacutjin chuya rè Nina hora xi choho ma naja ne, vèhè sahmi xi nindeyan cjuatacun naja cojo sa xi cuetjuntjen tsèhè jyé naja. Hane xi cuatjin sahmi ngu xuta ne, tsajin yo xi chuyiin rè. Peru hya xi tu choho má naja hora xi vatjun ngu cjuachoho sacuatjin sahmi xuta ngasunhndè ne, vèhè sahmi xi cueyan. <sup>11</sup>Chutsujun hacutjin canihñu hya xi canihñu hacutjin chuya rè Nina ngajñi rè cjuachoho xi cavatjun camá: jemu nguñaja tacún; jemu ndaja catuhun cjuaquixi nuju; hisca camacjan nuju; hisca carcun camá; canújun ta jemu meje chun ná ngu ndiya nga; jemu meje nihñu xcusun xi chuya ná; ngutjen canihñu castigu xuta xi choho casahmi me. Cuatjin camatsejen xi tyjahi jain cjuatacun nuju hacuaha tyjahi jain xahasen nuju. <sup>12</sup>Vèhè xi hya xi cuatjin catsihindu nuju xujun vèhè ne, hacuiin ngatsè rè xuta xi cavangui jyé, hacuiin ngatsè rè xuta xi choho

cavatju me camá ta xi cuatjin catsihindu nuju ne, ngatsè rè xi meje ná xi cuma tsejen hacutjin xi meje nihñu xcusun xi chuya niji ta, tsèhè xi hyun ta cuatjin xi meje rè Nina. <sup>13</sup>Hane hacuaha ngatsè rè vèhè xi ngayin ne, casacu niji cjuetacun.

Peru hacuiin suvá cjuetacun vèhè ni xi casacu niji ta hacuaha jemu ndaja camá rè xahasen niji ngatsè rè cjuasua xi tjin rè cha Tito. Cuatjin tjin rè cha cjuasua ta, tsèhè xi ngayujun ni ne, catuhun rè cha cjuandaja cjuajeya. <sup>14</sup>Jemu cavaxéndaja nuju hya xi cachjá cojo cha Tito, hane hacuiin cavétju sava ngahan xi camá ngascan. Hatuxa cjuaquixi yèjè ni cjuá xi canújin cojo nuju. Hacuanitjin ni cjuá xi canújin tsujun cojo cha Tito ta hacuaha cavetjucaa cjuaquixi. <sup>15</sup>Hacuaha jemu hmu cacun nuju cha, xi tsinguitsjen cha hacutjin canihñu yèjè hacutjin xi cachja cha cojo nuju, cojo hacutjin jemu ndaja cachjuhunrcun cha hya xi cachjuhunntsun cha. <sup>16</sup>Jemu ndama ná ta tsèhè xi hvè ta ngayun ne, mangu tacún cojo ná.

### Cjuatjo xi cjue Jerusalén

**8** Ngayujun ni ne, nguehe tihín cumachaya nuju hacutjin casua Nina cjuandaja rè me cojo xuta xi matangun me yèjè ni yungun xi siu taha ladu tsèhè estadu Macedonia vi. <sup>2</sup>Xuta xi cuicun vi ne, handasa jercu cavatju me cjuañihi, peru jemu sua ma rè xahasen rè me. Handasa jemu yuma camahani me ne, peru jemu jyé cjuatjo xi cavisecoo me. <sup>3</sup>Cahvè

xi casua me tucutjin xi camá casua me, hisca quisun sa casua me. Hacuaha cjuatacun rē suvá me <sup>4</sup>xi cafehya me xi tihín cahndé xi cojo me sahmi me cjuandaja xi cuisecoo me xuta ladu rē Jesucristu ngajan Jerusalén. <sup>5</sup>Hitsé sa ndaja casahmi me xi cuma rē sacuatjin caningatihin tacuin ngayin. Titjun ne, casua me yojo rē me cojo Nai naja ne, sehe casua me yojo rē me cojo niji ngayin, sacuatjin meje rē Nina. <sup>6</sup>Véhē xi canújin cojo cha Tito xi, sacuatjin xi ha cavetsihin casahmi tangun cha ngu cjuatjo véhē ngajñi nuju hatsëe ne, quihndé ne, hacuanitjin ni catitsinguijnetaha cha hiscan xi cavejñavasen. <sup>7</sup>Ngayujun ni ne, jemu tjin ngu tacún cojo Jesucristu; jemu ndaja nújun cjuar rē Nina; jemu vechu cjuatacun nuju; jemu nguñaja tacún xi meje cuisecun; jemu tjin nuju cjuahmutacun cojo niji. Sacuatjin tivangun xcun cojo yějē ni cjuatacun véhē ne, hacuaha meje niji xi cuanitjin ni cuangun xcun cojo ngu cjuandaja vi xi cuisecun rē xuta yuma.

<sup>8</sup>Hacuiin tivitéxa nuju xi cuitjin tichjá cojo nuju ta, tu titsingácun ni nuju hacutjin sahmi nguñaja cacun xuta Macedonia, cojo sa xi cuma tsejen há nechun nguñaja tacún jain cojo cjuahmutacun xi tjin nuju. <sup>9</sup>Ha ndaja hyun hacutjin casahmi Nai naja Jesucristu cjuandaja. Handasa jemu tjin rē me cjuanchina peru catsiyuma me yojo rē me ngatsé rē xi hmu cacun nuju me, cojo sa xi ngatsé rē xi camayuma me ne, ngayun xi cuisuhun ladu rē me ne, sacú nuju cjuanchina xi sua Nina.

<sup>10</sup>Nguehe cuichjá cojo nuju hacutjin xi tsingátaha cáacun. Ngayun xi hatuxa meje cuisecun hacuaha hisca cuyanu cavetsuhun cavisecun ne, <sup>11</sup>quihndé ne, meje rē xi ninguijnutuhun cjuandaja véhē. Tuhun hitsé xi tjin nuju sacuatjin canihñu titjún xi cojo cjuasua catuhun. <sup>12</sup>Sa xi ngu ngayaan meje jain tahan ngu cjuatjo ngu cjuandaja ne, cuma tahan tucutjin xi tjin naja xi tahan ta, véhē xi chuya rē Nina. Nina ne, fehyaain me hisca cojo xi tsajin naja.

<sup>13</sup>Hacuiin meje rē xi ngayun ne, hisca cuma chaja nuju ngatsé rē xi cuisecun rē jingu sa xuta. Xi meje rē ne, tangun ni cuatjun ngayejen ni. <sup>14</sup>Ngayun xi cjin tjin nuju quihndé ne, cuma cuisecun rē me xi tsajin rē, cojo sa xi hya xi ngayun tsajin nuju ne, me xi cuacun vë ne, cuma cuisecoo nuju me. Cuatjin xi tangun cuatjun ngayun cuma cojo rē me. <sup>15</sup>Cuitjin chja ngu cjuar xcun xujun rē Nina: “Xuta xi cjin cafaya me ne, cavanguiin rē me; hane xuta xi chuva cafaya me ne, camachajin rē me.”

#### Cha Tito cojo xicjin cha

<sup>16</sup>Suá nacuechji rē Nina xi cavuxaha me cjuatacun rē cha Tito cojo sa xi cuma meje cuisecoo nuju cha sacuatjin xi meje ná ngahan. <sup>17</sup>Hya xi cachjá cojo rē cha xi cjuetjengui nuju cha ne, jemu cachuya rē cha cjuar jan. Hane tséhē xi jemu tjin rē cha cjuasua xi sahmi cha tu mé ni xi satéxa rē cha ne, véhē xi cojo cjuatacun rē suvá ni cha ne, cjuetjengui nuju cha. <sup>18</sup>Hacuaha ningatjin sa ngu

cha ladu naja cojo cha Tito. Xuta xi matangun me yějē ni yungun ne, jemu vaxëndaja me cha xi cuajyihi vë, xi jemu ndaja xa sahmi cha xi tsinguitsojo cha cjuandajyihi xi chja tsëhë Jesucristu. <sup>19</sup>Hacuaha xuta xi cuacun jan ne, casua me cha xa xi cuisecoo niji cha xi cuanguin chani ngu cjuandaja vihi ngajan Jerusalén. Cuitjin tinihñi cjuandaja vihi cojo sa xi cuma tsejen ta Nai naja ne, jemu jyë hnga me cojo cjuatacun rë me hacuaha cojo sa xi cuma tsejen ta nguñaja tacuin xi visecuín xinguin. <sup>20</sup>Jemu nechin cuidadu, sá tu yo choho cuichja tsijin tsëhë cjuatjo rë xuta vi xi tacun ntsin. <sup>21</sup>Meje nihñi cjuandaja, hacuiin súv xacun Nina ni ta hacuaha cojo xacun xuta.

<sup>22</sup>Hacuaha cojo cha xi cuacun jan ne, ningatjin sa ngu cha ladu naja. Jemu cjín xcusun casahmi cha xi camatsejen xi jemu nguñaja cacun cha. Quihndë ne, hitsë sa nguñaja cacun cha xi meje cjue cha ta, tsëhë xi jemu camangu cacun cha cojo nuju. <sup>23</sup>Sacuaha cha Tito ne, jemu visecoo ná cha xi cuatjin visecuín nuju. Sacuaha cha ladu naja xi cuacun vë ne, xuta rë yungun catsingatju me cha hacuaha sahmi jyë sahmi hnga cha Jesucristu. <sup>24</sup>Vëhë xi meje ná ngahan xi tuhun cumachaya rë cha xi cuacun vë cjuahmutacun xi tjin nuju, cojo sa xi yějē ni xuta rë yungun cumachaya rë me ta quixi jain cjua xi nújin xi cuatjin naxinndijin nuju.

#### Cjuatjo xi cjue Jerusalén

**9** Quihndë ne, hacuiin hatuxa meje rë xi tsihindu nuju

hacutjin tijima tsëhë cjuatjo xi cjue cuisecoo rë xuta ladu rë Jesucristu ngajan Jerusalén ta, <sup>2</sup>tsëhë xi ha hvë ta jemu meje cuisecon rë xuta xi cuacun vë. Vëhë xi ha cachjá cojo xuta nguehe Macedonia xi ngayun xuta Acaya ne, hisca cuyanu cavetsuhun canihñu tangun tujún. Hane tsëhë xi jemu nguñaja tacún xi cuatjin canihñu ne, vëhë casahmi xi jemu cjín xuta Macedonia xi hacuaha caviyujungu cacun me xi cuisecoo me. <sup>3</sup>Vëhë xi tsingátju nuju ngujo cha ladu naja xi ha cachjá cojo nuju jan, sá tu cuetjicaain yějē ni cjua xi cachjá tsujun tsëhë cjuacjintacun vëhë. Meje ná xi tjin chjine ngayun sacuatjin xi ha cachjá tsujun, <sup>4</sup>tuxa má sa xi cojo ngujo xuta Macedonia cuinduva me cojo ná ndyá, hane tsajin tjin chjine ngayun ne, jemu cuixu sava ngayin, hisca cojo ngayun cuixu sava ngayun ta, tsëhë xi cuatjin camangu tacuin cojo nuju. <sup>5</sup>Vëhë xi catsingátaha cácuin xi casahmi ná ngujoyë xi caféhya cha xi cuacun vë xi cjuetjengui cha ngayun cojo chaja sa, cuisecoo nuju cha xi ninguiñunñuju tujún xi canújun jan. Xi cuatjin tjin chjine cjuandaja nuju vë ne, ngajan cuma tsejen xi hacuiin ngujoyë canihñi nuju ta cojo cjuasua nuju xi canihñu.

<sup>6</sup>Ha hyun ta yo xi chuva tjë cuincha ne, hacuaha chuva tutjé sacú rë; hane yo xi cjín tjë cuincha ne, hacuaha cjín tutjé sacú rë. Hacuanitjin ni ngayun cojo cjuatjo nuju. <sup>7</sup>Jima ngu ngayun ne, meje rë xi tuhun hacutjin xi cavejñu tacún xi tuhun, peru hacuiin taha

choho ma tacún, hacuiin cojo ngujyë. Cuatjin nihñu ta ngu xuta xi cojo cjuasua sua me ne, xuta vëhë xi jemu chuya rë Nina tsëhë me. <sup>8</sup>Nina ne, cuma sua nuju me yëjë ni cjuandaja rë me, cojo sa xi tsajin nixtin xi cuma chaja nuju; hisca cuangui sa nuju, cojo sa xi cjín xcusun cjuandaja cuma nihñu. <sup>9</sup>Xcun xujun rë Nina ne, cuitjin chja:

Xuta ndaja jan ne, chuva cjín sua me xuta yuma.

Hane cjuandaja xi sahmi me vëhë ne, tsajin nu tsajin nixtin xi chaya rë Nina.

<sup>10</sup>Nina, me xi sua tjë xi nitjen cojo niñu xi chinë ne, hacuaha sua nuju me yëjë ni tjë xi mameje nuju, hacuaha me vëhë sahmi me xi cuma cjín sa tutjë xi sacu nuju. Hacuaha sahmi me xi cuma yehe sa yëjë ni cjuandaja xi nihñu. <sup>11</sup>Cuatjin sahmi Nina xi jemu ndaja cuatjun cuma, cojo sa xi yehe cjuandaja cuma nihñu. Hane xi nihñi entregadu cjuandaja nuju jan cojo xuta yuma ne, sua me nacuechji rë Nina. <sup>12</sup>Xi cuitjin cuanguinchani ngu cjuandaja nuju vë ne, hacuiin suvá xi nicjen cjuachaja xi tjin rë xuta ladu rë Jesucristu ta, hacuaha nihña xi jemu cjín xuta ne, sua me nacuechji rë Nina. <sup>13</sup>Xi cuitjin nihñi ngu cjuandaja vë ne, ngajan cuma tsejen xi ngayun ne, tiniñu jain sacuatjin xi nújun xi macjain nuju cjuandajyihí xi chja tsëhë Jesucristu. Hacuaha cuma tsejen ta jemu ndaja tivisecon rë xuta Jerusalén, hacuaha jemu ndaja visecon rë yëjë ni xuta yuma xi ladu rë Jesucristu. Vëhë xi ngahan

cojo yëjë ni me xi visecon ná ne, jemu nihñi jyë Nina. <sup>14</sup>Hacuaha xuta ladu rë Jesucristu ngajan Jerusalén ne, sahmi me oración rë me cojo Nina ngatsë nuju, hacuaha jemu cuinga rë me ngayun xi cumachaya rë me tsëhë cjuandaja xi jemu casua nuju Nina. <sup>15</sup>Nacuechji rë Nina xi casua naja me ngu cjuandaja ngu cjuatjo xi hisca hyaan hacutjin cuinújan xi venguichji rë.

**Vaxëtje Pablo xa xi casua Nina me**

**10** Ngahan Pablo ne, nguehe cuichjá cojo nuju cojo cjuandaja cjuajeya rë Jesucristu. Chja yahnga xuta ta ngahan ne, hya xi tejñataha tangun cojo nuju ne, jemu jeya ngahan; peru hya xi cjin tejñataha tsujun ne, jemu hñu cjua naha cojo nuju. <sup>2</sup>Ndatjin, peru nguehe cjuéhya nuju ngu cjuandaja: xicanihñuu xcusun xi sahmi xi sahme hñu cjua naha hya xi cjuétjengë nuju. Ha hvë ta cuma sahme hñu cjua naha cojo xuta xi chja cojo nuju xi ngayin ne, suvá cjuatacun rë xuta ngasunhndë xi quichihin. <sup>3</sup>Quixi jain xi xuta ngasunhndë ngayin, peru hacuiin sí rcuin sacuatjin sí rcu xuta ngasunhndë. <sup>4</sup>Hacuiin chicjin cojo quicha ta Nina ne, sua niji me ngahñu xi caa niji ninguetsinyin cjuatacun rë xuta xi tsitjungui me Nina; xi visiajmí ngayin cojo xuta xi cuacun jan ne, ngutjen tsejen ta machjiriin cjuatacun rë me. <sup>5</sup>Ninguetsinyin cjuaxin xi sahmi xi maji vijnercu me yo xi Nina, hacuaha ninguíxin cjuatacun rë xuta cojo sa xi tsingataha cacun me

sacuatjin meje rë Jesucristu. <sup>6</sup>Hane hya xi cuechu nixtin xi ngayun ne, jemu ndaja camahani cuinuhyun tsêhë Nina ne, ha tjin ngu tacuin xi nihñi castigu yêjê ni me xi vihndiin tsêhë Nina.

<sup>7</sup>Ngayun ne, tiningatuhun tacún sacuaha tsingataha cacun xuta ngasunhndë. Sa xi tjin yahnga xuta xi tsingataha cacun me xi ladu rë Jesucristu me ne, ndatjin; peru hacuaha catitsingataha cacun me xi, sacuatjin xi ladu rë Jesucristu me ne, ngayin ne, hacuaha cojo ngayin ladu rë Jesucristu ngayin. <sup>8</sup>Handasa cuátjutaha hitsë xi cuichjá cojo nuju sacuaha tsêhë xa xi casua niji Nai naja ne, peru hacuiin cuma sava ná. Nai naja casua niji me xa vëhë, cojo sa xi cuisecuin nuju xi cuangunndujun xi mangu tacún cojo cjua rë Nina, hacuiin xi ninguetsein cjuatacun nuju.

<sup>9</sup>Hacuaha mijí ná xi ningatuhun tacún xi meje cuinchárcun nuju cojo yêjê cjua xi tsihindu nuju.

<sup>10</sup>Cuinújun ngu ngayun ta jemu hñu cjua naha xi tsihindu nuju, peru hya xi tejñataha cojo nuju ne, jemu yuma hasen ngahan, hacuaha hisca chuyiin nuju chuva rë xi visiajme.

<sup>11</sup>Peru cuidadu xi cuatjin nújun ta, chuva rë xi nújin cojo nuju xcun xujun xi nihindin nuju quihndë xi xín nechintihin tsujun ne, ha chuva vëhë ni nihñi hya xi cuéchintihin nuju.

<sup>12</sup>Ngayin ne, vetjiin tacuin xi cuinújin xi tangun ngayin cojo ngujo me xi vaxëndaja suvá me yojo rë me. Xi cuatjin tsichuva me cjuatacun rë me ngajñi rë suvá me ne, jemu ngarca me. <sup>13</sup>Ngayin ne,

cuinujin xi jemu ndaja canihñi ngu xa xi hisca canihñi. Ha tucutjin xa xi canihñi ne, ha vëhë ni xi cuinújin. Nina ne, me vëhë xi vitexa niji me jani hiscan cuechin xi nihñi xa, hacuaha me vëhë cavitexa niji me xi catsanguin hisca ngajan nangui nuju. <sup>14</sup>Vëhë xi hya xi ndaja nújin tsujun ne, hacuiin sacuaha xi vatjintihin rë xa xi casua niji Nina ta, tjun tjun ngayin cafihin nangui nuju cojo cjuandajyihí xi chja tsêhë Jesucristu. <sup>15</sup>Hacuaha hacuiin naxinndijin yojo niji tsêhë ngu xa xi casahmi jingu sa xuta. Peru vetihin tacuin xi sacuatjin xi cuangun xcun xi hitsë sa ndaja cumacjain nuju Jesucristu ne, hacuaha hitsë sa jyë xa cuma nihñi ngajñi nuju. <sup>16</sup>Ngajan xi cuma cuanguin tihín cumachaya rë xuta cjuandajyihí tsêhë Jesucristu hisca ngajan sa tsêhë nangui nuju. Xi cuatjin ne, tsajin yo cuichja xi ngayin ne, naxinndijin yojo niji tsêhë ngu xa xi jingu sa xuta casahmi me.

<sup>17</sup>Yo xi meje cuaxëndaja rë tu yo ni ne, cataxëndaja me Nai naja, sacuatjin chja xujun rë Nina.

<sup>18</sup>Cuatjin ta, xi naxenndajan suvaan yojo naja ne, machjiriin camahani. Xi machjirêhë ne, xi Nai naja cuaxëndaja naja me.

#### Chja Pablo tsêhë apóstol ndacha

**11** Nijyun tacún. Caticaa nuju ndastu ngujo cjuasca xi cuichjá cojo nuju. Handasa hacuiin sca ná peru cuichjá cjuasca ta, <sup>2</sup>tsêhë xi jemu chini ngahan tsujun. Nina ne, casua ná me cjuatacun xi cuatjin chini ngahan ta, tsêhë xi ngayujun ni ne, sacuaha ngu



quihndi naha xi chjuun xi casuá xi cuixan cojo ngu ni xihin. Cuatjin nuju ngayun. Hane xihin jan ne, hacui Jesucristu. <sup>3</sup>Hatsëë ne, chu yë cavindacha chu na Eva cojo cjuatacun tsehen rë chu. Hane hacuaha jemu macjín cáacun tsujun ta sá tu cuatjin ningatuhun cumandacha ngayun, hane ha quihndë hacuiin nguñaja tacún cuangunndujun cojo ndiya rë Jesucristu xi tivanguncujun. <sup>4</sup>Hya xi fehe ngu cha xi sua cumachaya nuju ngu cjua xi chja tsëhë Jesús xi hacuiin tangun cojo cjua xi cachjá cojo nuju ntsacu cavetsihin ne, ¿mé má cha vëhë xi jemu ndaja caa nuju cojo cjua rë cha? O sa xi chjuhunntsun ngu cjuatacun xi hacjahi, xi hacuiin tangun cojo cjuatacun xi cachjuhunntsun ntsacu cavetsihin ne, ¿mé má cjuatacun vëhë xi jemu ndaja caa nuju cojo? O sa xi fehe ngu cjuandajiyi xi hacjahi, xi hacuiin tangun cojo cjuandajiyi xi cachjuhunntsun ntsacu cavetsihin ne, ¿mé má cjua vëhë xi jemu caa nuju cojo?

<sup>5</sup>Quihndë ne, nguehe cuetsehen cuichjá cojo nuju cjuasca. Caticaa nuju hitsë ta, tsëhë xi xi má ná ngahan ne, hacuiin tjëngë ngahan xi cuma rë cha xi cuacun núnun xi apóstol yehe cha. <sup>6</sup>Handasa cjëë scutaya hacutjin xi jemu ndaja cuma cuichjá cojo xuta, peru jemu cavutaya cjuatacun rë Nina. Hane ngajñi rë yëjë ni xcusun xi canihñi, ngajñi rë yëjë ni cjua xi canújin ne, cahyun suvun hacutjin vechu cjuatacun niji.

<sup>7</sup>Catsinguíjne suva yojo naha cojo sa xi ngayun ne, cuma yehe

cuma hnga ngayun cojo cjuatacun nuju. Hane xi casuá camachaya nuju cjuandajiyi xi chja tsëhë Nina ne, cafaan camahani chjí tsujun. ¿Mé jyé quítjen xi cuatjin casahme? <sup>8</sup>Ngahan ne, cafhá tujún tsëhë xuta xi matangun yungun xi yahnga. Me vëhë cavechji ná me cojo sa xi cuma cuisécoo nuju ngayun. <sup>9</sup>Hora xi camachaja ná hya xi cavitejñataha cojo nuju ne, hisca ngu ngayun ne, casuandyaan nuju xi cuisecun ná ta, ngujo cha xingueen xi canduva cha tsëhë Macedonia ne, cha vëhë casua ná cha mé xi casahmi chaja ná. Hatuxa cavitejña cuidadu xi tsajin camahani mé cjuandya xi suá nuju, hacuaha ha cuanitjin ni sahme nchujunni nguini. <sup>10</sup>Jiya cjuaquixi rë Jesucristu cahntsua xahasen naha. Hatuxa cuichjá sa cojo xuta ngajan yëjë ladu tsëhë estadu Acaya hacutjin casuandyaan camahani nuju. <sup>11</sup>¿Mé má cuatjin cuichjá sa? ¿Há tsëhë xi mijí ná ngayun? Vëë Nina ta jercu meje ná ngayun.

<sup>12</sup>Peru sacuatjin xcusun xi ha sahme ne, ha cuatjin cjuënduju sa sahme, cojo sa xi tsinguétsun cjua rë cha xi cuacun vanguise chuva rë xi cuichja cha xi xa xi sahmi cha ne, tangun cojo xa xi nihñi. <sup>13</sup>Cha vëhë ne, hacuiin apóstol xi cjuaquixi cha. Tu vindacha ni cha xi chja cha xi apóstol tsëhë Jesucristu má cha. <sup>14</sup>Peru hacuiin fircun ná xi cuatjin ma vindacha cha ta, hisca Satanás ne, ma vindacha naja xi sahmi yojo rë sacuaha ngu xi catsingatju Nina. <sup>15</sup>Vëhë xi cojo cha xi cuacun sahmi xa rë xitsehen vë ne, hacuiin chja ma sahmi cha xi cuma cha sacuaha

cha xi sahmi cjuaquixi jain. Peru cha xi cuacun vë ne, ha cuatjin cjuë cha sacuatjin meje rë xcusun xi sahmi cha.

**Cjuañihi xi vatju apóstol Pablo**

<sup>16</sup>Cuichjá nga cojo nuju ngu ndiya ta, xicaningatuun tacún xi sca ná. O sa tsajin ne, handasa sacuaha xi sca ná má nuju ne, peru tuhun cahndé xi hacuaha cojo ngahan ne, cuaxëndaja hitsë yojo naha sacuatjin sahmi cha xi vaxëndaja yojo rë vë. <sup>17</sup>Xi cuitjin vaxëndaja yojo naha ne, hacuiin tichjá sacuatjin chja Nai naja ta tichjá sacuaha xi sca ná. <sup>18</sup>Jemu cjin xuta xi vaxëndaja me yojo rë me ngatsë rë xcusun xi cun xi má suvá me hacuaha xi vatju suvá me má, vëhë xi hacuaha cojo ngahan ne, cuatjin cuaxëndaja hitsë yojo naha. <sup>19</sup>Xi má nuju ngayun ne, jemu quicuntacun. Peru jemu ndaja caa nuju cojo cjua rë xuta sca rë. <sup>20</sup>Jemu caa nuju tu yo ni xi vitexa nuju hacuaha xi mosu rë ngayun, sacuaha xi matitjun me tsujun; tu yo ni xi sahmi jyë sahmi hnga suvá yojo rë, tu yo ni xi sahmi chuva nuju. <sup>21</sup>Peru savaain camahani ná xi cuichjá cojo nuju xi ngayin ne, sacuaha xi jemu yuma hasen ngayin xi cuatjin nihñi cojo nuju.

Peru sacuatjin vetju cacun cha xi cuacun jan xi vaxëndaja cha yojo rë cha ne, hacuaha ngahan ne, cuatjin vetju cáacun xi cuaxëndaja yojo naha. Peru sacuaha xi sca ná xi cuitjin tichjá cojo nuju. <sup>22</sup>¿Há ma chja cha hne hebreo? Ngahan ne, hacuaha ma chjá. ¿Há xuta tjë rë Israel cha? Ngahan ne, hacuaha

xuta tjë rë Israel ngahan. ¿Há tjë rë Abraham cha? Ngahan ne, hacuaha tjë rë Abraham ngahan. <sup>23</sup>¿Há sahmi cha xa rë Jesucristu? Sacuaha xi jercu sca ná xi cuitjin chjá, peru ngahan ne, hitsë sa ndaja sahme xa rë Jesucristu. Hitsë sa jercu casahme xa xi cuma rë cha xi cuacun vë. Hitsë sa cjin ndiya cëjë ndavaya. Hitsë sa cjin ndiya casehen ná. Jemu cjin ndiya xi hitsë sa ne, caveya ngahan. <sup>24</sup>Xutaxa rë xuta Judea ne, hñü ndiya casahmi ná me castigu xi cavaja ná me can tyjuhun ñuju can tyjuhun ñuju cuarta xi ngu ngundiya. <sup>25</sup>Jyan ndiya ne, ya cavaja ná xuta; ngundiya ne, cavetaha ná me ndyojo; jyan ndiya nga ne, quijingahma barcu xi cjuicojo ná; ngundiya tsëhë jyan ndiya vëhë ne, cavitejñaya ngu nixtin cojo ngu nixten ngajñi ndachacun. <sup>26</sup>Jercu fé camahani ngu nangui; hane xi cuatjin tsujyëhëya ne, hacuaha jemu tsavi xi vátju ndajyë, jemu tsavi tsëhë cha chëjë, jemu tsavi cojo cjuahngatacun xi sahmi xuta nangui naha, hacuaha tsavi cojo cjuahngatacun xi sahmi xutaxín; jemu cojo tsavi xi tejñataha ngu nandya; jemu cojo tsavi xi tejñataha ngu nguijña; jemu tsavi xi vátju ndachacun; jemu tsavi xi tsujyëhëya cojo cha ndacha xi chja cha xi cha ladu naja cha. <sup>27</sup>Jemu chja camahani xa xi casahme hacuaha jemu chja cavátju camá; jemu cjin ndiya xi hisca camaji cafãñafë; tjin hora ne, jemu yojo ná, jemu xinda ná; jemu cjin ndiya xi cajinëë niñu; tjin hora xi jemu hnchan ná, hacuaha camachaja tsjian naha.

<sup>28</sup>Hane tsëhë yëjë ni cjuacjintacun xi cuacun vëhë ne, nchu nchujunni ne, sesuntaha sa ngu: jemu vityanguë cáacun tsëhë xuta xi ma tangun me yëjë ni yungun, hacutjin tivatju me tijima. <sup>29</sup>Sa xi choho vatju ngu xingueen má ne, ngahan ne, hacuaha choho ma ná. Sa xi yo sahmi xi cjuinenguia ngu xingueen ngajñi rë cjuatsehen ne, hacuaha ngahan ne, jemu cuma cjan camahani ná. <sup>30</sup>Sa xi meje rë xi cuaxëndaja yojo naha ne, cuichjá cojo nuju hacutjin yuma hasen ngahan. <sup>31</sup>Nina Nahmi rë Nai naja Jesús ne, me vëhë xi hatuxa jyë hnga me yëjë nu yëjë nixtin ne, me vëhë xi vëë jain me ta hacuiin tivindácha xi cuitjin tichjá cojo nuju. <sup>32</sup>Ngundiya hya xi cavitejñataha ngajan nandya Damasco hiscan vitexa Aretas ne, ngu xutaxa rë xi catsingatju Aretas ne, caviyujutaha me sindadu tingotjo rë nandya jan xi cjuaha cha ngahan cjucojo ná cha. <sup>33</sup>Peru ngujo xingueen ne, quijicojo ná me xcun ngu ventana tsëhë taha xihndë tsëhë hnhua rë nandya jan, caveya ná me cahntsua ngu changa jyë, sehe catsitujne ná me taha candatsen. Cuatjin camá xi cavétjutjë tsëhë gobernador jan.

### Chja nijña cojo Pablo

**12** Tjin ná xi cuaxëndaja sa yojo naha. Hacuaha handasa tsajin mé machjirëhë xi cuitjin sahme ne, peru nguehe cuichjá cojo nuju hacutjin casahmi Nai naja xi cuichja nijña cojo ná ngu jo ndiya. <sup>2-3</sup>Ngahan ne, hvë ngu xihin xi ma ladu rë

Jesucristu, hane camateñuju nu jan ne, quijicojo rë cha hisca hiscan majyan ngahnga hisca hiscan tacun Nina. (Xihin xi quijicojo rë ne, hacui Pablo.) Hveen ne, chá xi cojo yojo rë cha quiji cha? ne, o chá xi hasen ni rë cha xi quiji? ta, suvá Nina ni vëë me hacutjin camá. Mé ta cha xi cuajyihi vë ne, <sup>4</sup>quijicojo rë cha ngajan ngahnga ngu cahndé ndajyihi xi hmí paraíso, hane ngajan cahndë cha cjua xi hisca sacuiin chuva rë hacutjin cuichja nga cha cojo xuta, hacuaha hisca sacuiin cahndé xi cuya cuichja nga cha cjua jan cojo xuta. <sup>5</sup>Cuaxëndaja xcusun xi casahmi Nina cojo rë cha vëhë, peru hacuiin cuaxëndaja yojo naha suva; sa xi cuichjá tsahan ne, cuichjá hacutjin xi yuma hasen ngahan. <sup>6</sup>Sa xi meje cuaxëndaja sa yojo naha ne, hacuiin sca ná ta, tsëhë xi suvá cjuaquixi xi cuichjá. Peru ha quihndë sahme sa cuatjin ta, tsëhë xi mijí ná xi ngatsë rë cjua vëhë ne, tsingataha cacun ngu xuta xi jemu ngu cha machjirëhë ngahan. Xi meje ná ne, xi catutsejen xuta jan xcusun xi sahme hacuaha catisiñuju me cjua xi chjá, sehe tsingataha cacun me ne, há machjirëhë ne, o há machjiriin ngahan.

<sup>7</sup>Hacuaha cojo sa xi hacuiin cuátjutaha xi ndaja tsingátaha cáacun tsahan suva ngatsë rë cjuandaja xi casahmi Nina cojo ná xi cuatjin cachja nijña cojo ná ne, vëhë xi casua me cahndé xi Satanás ne, suandya ná sacuatjin suandya naja ngu nahyá xi maji naxenxen, cojo sa xi hacuiin cuátjutaha xi ndaja tsingátaha cáacun tsahan suva. <sup>8</sup>Jyan ndiya caféhya rë Nai

naja xi cuetjuxin cjuandya jan;  
<sup>9</sup>peru cachja me cojo ná cuitjin:  
 “Cjuandaja xi suá ri ne, vèhè yèjè  
 ni xi mameje ri ta, tsèhè xi hiscan  
 xi yuma hasen xuta ne, ngajan xi  
 ma visehen ngahñu naha.” Cuatjin  
 cachja me. Vèhè xi hisca nguñaja  
 cáacun xi vaxéndaja yojo naha  
 ngatsè rë xi yuma hasen ngahan,  
 cojo sa xi ngahñu rë Jesucristu ne,  
 cuma cuisehen ngajñi rë cjuatacun  
 naha. <sup>10</sup>Vèhè xi hisca ndama ná  
 xi jeya ngahan, ndama ná hya xi  
 choho chja xuta tsahan, ndama ná  
 xi vátju ngu cjuandya jyë, ndama  
 ná hya xi vátju cjuañihi, ndama  
 ná hya xi sacuiyiin ná hacutjin  
 cuaxétjè yojo naha. Jemu ndama  
 ná xi cuatjin vátju má cjuacjintacun  
 vèhè ngatsè rë Jesucristu ta, tsèhè  
 xi hya xi jemu yuma hasen ngahan  
 ne, hya jemu sacu ná ngahñu rë  
 Nina.

**Cjín tsingataha cacun Pablo  
 tsèhè xuta rë yungun Corinto**

<sup>11</sup>Ngahan ne, sacua ha xi sca  
 ná, peru ngayun quitjun jyé xi  
 cuitjin tichjá cojo nuju. Xi meje  
 rë ne, ngayun ndaja cuinújun  
 tsahan ta, tsèhè xi handasa chja  
 yahnga xuta ta tsajin mé venguichji  
 ná, peru cumaji cuatjutaha ná  
 cha xi nújun xi apóstol yehe vë.  
<sup>12</sup>Xcusun xi casahme ngajñi nuju  
 ne, casua machaya nuju ta ngu  
 apóstol xi cjuaquixi ngahan. Jemu  
 cacaa ná cojo nuju xi cuatjin  
 cavisécoo nuju hya. Ngayun ne,  
 jemu quijircun nuju hisca carcun  
 xi cahyun cjuarcun xi casahme.  
<sup>13</sup>Tangun casahme ngajñi nuju  
 cojo xi casahme ngajñi rë yèjè xuta

rë yungun xi yahnga, cuenda xi  
 casuandyaan nuju xi cuiseacun ná  
 tsèhè gastu naha. Sa xi cuaaintjin  
 xi casahme cojo nuju xi má nuju ne,  
 nijyun tacún cojo ná.

**Chja Pablo xi cjue me má jyan  
 ndiya nandya Corinto**

<sup>14</sup>Quihndè ne, cuma jyan ndiya  
 xi cjuétjèngè nuju ne, hacuaha  
 suandyaan camahani nuju ta,  
 hacuiin xcusun xi tjin nuju xi meje  
 ná ta suvun xi meje ná ngayun. Miji  
 rë xi nixti cuetjo tujún xi cuisecoo  
 rë xutacha rë ta xutacha rë cuetjo  
 me tujún xi cuisecoo rë nixti rë me.

<sup>15</sup>Ngahan ne, cojo yèjè ni cjuasua  
 tsicojó tujún naha ngatsè nuju,  
 hisca tsicjè ngahñu naha ngatsè  
 nuju. Xi má ná ne, tucutjin xi hitsè  
 sa vinga ná ngayun ne, ngayun ne,  
 hitsè sa chuva vinga nuju ngahan.

<sup>16</sup>Cuichja yahnga xuta tsahan  
 ne: “Jéya. Hacuiin casuandya naja  
 cha tsèhè gastu rë cha, peru tsèhè  
 xi jemu quicun cacun cha ne, jemu  
 cavindacha naja cha.” Cuatjin  
 cuichja yahnga xuta tsahan. <sup>17</sup>¿Há  
 cavindácha nuju xi catsingátju nuju  
 ngujo cha xi quijitjengui nuju cojo  
 cju naha? <sup>18</sup>Cachjá cojo cha Tito  
 xi cjuetjengui nuju cha, hacuaha  
 catsingátju sa ngu cha xingueen  
 cojo cha Tito. ¿Há cavindacha nuju  
 cha Tito vë? Jéya. Ha ndaja hyun  
 ta cha vèhè ne, hya xi quitaha cha  
 cojo nuju ne, tangun cjuatacun rë  
 cha cojo cjuatacun naha, hacuaha  
 tangun xcusun xi casahmi cha cojo  
 xcusun xi ha casahme ngahan.

<sup>19</sup>Ngu ngu ngayun ne, ningatuhun  
 tacún xi cojo nuju ngayun titihín  
 cjuaquixi niji. Peru hacuiin cuatjin

ta, xcun Nina ne, cuitjin tinújin ngatsë rë xi tjin tangun cjuatacun niji cojo Jesucristu. Peru yëjë ni cjua xi tinújin ne, tinújin ngatsë nuju ngayujun ni, tsan, cojo sa xi cuma yehe sa cjuatacun rë Nina xi tjin nuju. <sup>20</sup>Jemu macjín cáacun, sá nihñuu tutjin xi meje ná, hacuaha sá sahme tutjin xi meje nuju, hya xi cjuëhë nangui nuju. Jemu macjín cáacun, sá tacun si ngajñi nuju, sá tjin cjuachini ngajñi nuju, sá cjan nuju cojo xingun, sá hnga tacún, sá tjin cjuandesu ngajñi nuju, sá tjin cjuachjataha ngajñi nuju, sá tjin cjuaxta ngajñi nuju, sá tujyë tinihñu. <sup>21</sup>Jemu macjín cáacun sá sahmi chuva Nina ngahan ngajñi nuju hya xi cjuëhë nga ngundiya nangui nuju; hacuaha jemu macjín cáacun, sa choho cuma rë xahasen naha ngatsë rë ngu ngu ngayun xi mijí nindeyun cjuatacun nuju hacuaha hacuiin caviyujunxun cjuatsehen xi nihñu, hacuaha cjuatsehen xi sahmi xuta cojo ngu xi hacuiin chjuun rë me, hacuiin xihin rë me.

#### Conseju xi sua Pablo

**13** Quihndë ne, cuma jyan ndiya xi cjuétjengë nuju. Sacuatjin camahindu xcun xujun rë Nina xi jo o sa xi jyan xuta sua me cjuaquixi rë me tsëhë ngu cha xi caxincha jyé rë ne, sehe cuma chihin cjua jan, há cuma cha castigo o há xi cumaji cha castigo. <sup>2</sup>Hya xi cavitejñataha cojo nuju xi ma jo ndiya ne, cachjåtaha rë xuta xi casahmi cjuatsehen; hane quihndë xi xín tejñataha ne, cúa cuichjá nga cuatjin cojo

nuju ngayujun ni xi cjëë cuichjá cojo nuju ta, hya xi cuinduva nga ngundiya ne, ha quihndë tsajin yo cuetjutje tsëhë castigo xi fehya jyé rë. <sup>3</sup>Cuatjin sahme ta, tsëhë xi ngayun ne, tivinchunsun chuva rë xi meje cumachaya nuju há cjuaquixi xi Jesucristu ne, sua ná me cjua xi chjá cojo nuju. Me vëhë ne, hya xi tsichuva nuju me ne, hacuiin jemu yuma hasen me ta jemu hñu ngahñu rë me, jemu hñu cjuatacun rë me ngajñi nuju. <sup>4</sup>Cjuaquixi xi jemu yuma hasen me hya xi catsiquehen xuta me xcun cru; peru tjin rë me ngahñu rë Nina quihndë xi tacun nga me cjuahñu. Hacuaha ngayin ne, xi tjin tangun cjuatacun niji cojo rë me ne, jemu yuma hasen ngayin. Peru cuinechin cjuahñu cojo rë me cojo ngahñu rë Nina cojo sa xi cuma cuisecuin nuju.

<sup>5</sup>Chjuhunchuvun suvun ni yojo nuju, ¿há nechunyun jain ndiya rë Jesucristu? Nichuvun suvun ni yojo nuju. Ngayun ne, hatuxa machaya nuju suvun xi Jesucristu ne, jiya me cahntsua xahasen nuju, jiya me ngajñi rë cjuatacun nuju. Sa xi tsajin ne, cuetjun ndesu ngayun. <sup>6</sup>Hacuaha vetahá cáacun ta ngayun ne, cumachaya nuju ta ngayin ne, hacuiin ndacha ngayin. <sup>7</sup>Tichjahyin rë Nina cojo sa xi ngayun ne, hacuiin nihñu cjuatsehen. Cuatjin chjahyin, peru hacuiin ngatsë rë xi meje niji xi cuichja xuta ta jemu ndaja xa canihñi ta, xi meje niji ne, xi nihñu cjuandaja, handasa cuichja xuta xi ngayin ne, sacuaha xuta ndacha ngayin. <sup>8</sup>Ngayin ne, tsajin mé venguichji rë xi nihñi xcusun xi hacuiin cjuaquixi ta xi venguichji rë xi nihñi ne, xcusun xi cjuaquixi. <sup>9</sup>Jemu ndama niji hya xi

jemu yuma hasen ngayin hane ngayun ne, jemu hñu cjuatacun nuju. Hacuaha chjahyin rë Nina xi xcun ngasunhndë nuju ne, cuiyujuchihin cjuatacun nuju, cuma tyjahi xahasen nuju. <sup>10</sup>Vëhë xi cuatjin titsihindu nuju cjua vëhë xcun xujun vihi quihndë xi chaja sa cjuétjängë nuju, cojo sa xi hya xi cjuëhë ngajan ne, hacuiin jemu hñu cjua naha cojo nuju ta Nai naja ne, casua ná me xa xi cuisécoo nuju, hacuiin xi tsinguétsun cjuatacun nuju.

**Tsinguijnetaha Pablo cjua**

<sup>11</sup>Quihndë ne, ngayujun ni ne, catama sua rë xahasen nuju; tiyujunchuhun

cjuatacun nuju; tuhun cjuetacun xahasen nuju; nihñu tangun cjuatacun nuju cojo xingun; tinechun cojo cjuandaja cojo cjuajeya; hacuaha xicamacjiin tacún ta Nina xi sua cjuahmutacun sua cjuajeya ne, cuisécoo nuju me. <sup>12</sup>Tuhun rë xingun nina, cojo cjuandaja cojo cjuahmutacun chutatsuhun xingun, sacuatjin xcusun naja. <sup>13</sup>Yëjë xuta ladu rë Jesucristu ne, tsingatju me ngu nina tsujun. <sup>14</sup>Jesucristu, Nai naja ne, catisua nuju me cjuandaja rë me; Nina ne, catisua nuju me cjuahmutacun rë me; hane Hasen rë Nina ne, catisécoo nuju ngayujun ni.